



Ve chi che o sin!

Come che us vin dite pôcs dîs indaûr, o sin chi a presentâus la **gnove stagjon di Contecurte!**

Ma anìn par ordin, ancje se cence tant batecolâ a jessi formâi...

Alore, tant par començâ o tignarìn bogns, come dîs pes publicazions, lunis, miercus e vinars, cirint di jessi costants, come che o vin rivât a jessi la stagjon passade. Par clâr, il teme de nestre Ostarie al è e al restarà tal sô non: **Contis Curtis par furlan.**

E par "curte" o nin indevant a intindi contis che a zirin ator des 2000 batudis, comprendûts i vueits. Par proponinus une conte, o ancje dome par saludânus o lassânus cualsisei sugjeriment, al baste che o scrivês ae nestre direzion di pueste, che o a cjatais là sù, adalt, a man çampe.

E dopo lis contis, come simpri gjestidis dal Ostîr, ce al restie, des rubrichis di simpri?

Se no s'al seis domandât, us al disìn nô!

Us disìn subit che **il nestri Garzon**, che nus à tignût compagnie cu lis sôs traduzions di autôrs nomenâts intes sôs "*contis misteriosis*", si cjape une meretade polse, e cuissà che no nus torni a scrivi cualchi conte o cualchi *ispirazion*, par stiçanus nô a scrivi...

Come lui, ancje **il nestri preseât Camarîr** al lassarà in bande lis lezions e curiositâts di lenghe furlane, rivadis aromai a un bon nivel di cuantitât. O sperìn però che nol stedi cu lis mans in man e i vin za proponude une gnove rubriche, che a vedi simpri a cefâ cu lis **lidrîs de nestre lenghe** e lis fueis che a colin. Viodin ce che al si invente...

Il nestri **Ostîr in seconde**, invezit, al si è za cjapât il compit di stâ daûr a lis gnovis che a podìn interessâ ae nestre Ostarie e o vin decidût di dâi cjarte blancje su la zornade di

publicazion, che e podarà jessi cualsisei de setemane. Mior savê lis robis subit, o vin pensât. E o vin pensât ancje che **il nestri Famei**, simpri pront a une clamade par fâ diventâ la Ostarie di virtuâl a reâl, intant che al spiete al pues intant metisi sot cu lis contis, e di fat, al à lavorât ancje dilunc de Istât.

Finide chi?

Eh no! Nus vanze di dîus la part plui impuartante: il **rignoviment**.

Tant par començâ, cuntune operazion segrete rivade par câs ae fin de stagjon passade, si sin sigurâts i dirits par **dîs piçulis contis di Ivano Urli**. A dî il vêr, in grazie ae sô femine, lis contis a son cuasit une robarie, parcè che a son nadis come contis de buinegnot che Ivano al scriveve ae fie, ogni sere, intun periodi che jê e jere lontan di cjase par lavôr. Lis **Contis de buinegnot** - cussì lis vin clamadis - a cjacarìn de int dal paîs, di cjacaris di une volte, cuasi a volê tignî di cont e salvâ dal dismenteâsi i piçui ricuarts di ogni dì. Cuant che lis vin letis, nus è plasude une vore la lôr semplicitât e spontaneitât, e par chel o vin decidût di regalâ ai nestris letôrs, cun bonstâ dal lôr autôr, cussì come che a son nadis, cence fâ corezions e variacions di ogni gjenar.

E ae fin, ma no ultin, o vin **une gnove entrade in tal organic de nestre Ostarie**. A vin decidût, par cumò, di cjapâlu sù come **Garzon in seconde**, e a lu vin za metût in vore par une rubriche simile a chê dal Garzon, ma che 'nd à la particolaritât di saltâ il talian. Di fat, propit cussì o volevin clamâle, ma il so autôr al à proponût il non di **Ecumène**, dal grec, ven a stâi "*la cjase dulà che ducj a vivìn*". Cui isal chest gnûf garzon? Ma Pablo Gortan!

E la rubriche Ecumène no sarà il so unic contribût a la Ostarie. I vin za dât doi lavôrs: il prin al è di cjatâ cualchi contribût ae sô rubriche che al tocji altris lenghis in plui di chês che al studie, il secont - jessint che cumò nus stâ leint de Russie, al è chel di contâncus alc di chê Europe lontane. Viodìn, ce che al saltarà fûr...

Ben, disarès che o vin dit vonde.

Se la gnove stagjon di Contecurte us plâs, diseitnusal cuntun coment, o ancje dome cuntun clic su mi plâs, che o vin gust di tornâ a tirâ dongje i nestris contecurtârs e i nestris letôrs.

E simpri se la gnove stagjon us stice, **judaitnus a sparniçâ il verp di Contecurte!**

Chei di Contecurte